

Vuk'uzenzele

Ipapashwe liZiko lezoNxibelelwano loLwazi lukaRhulumente (i-GCIS)

IsiXhosa/English

EyeSilimela 2022 Ushicilelo 1

Bathweswe izidanga abongikazi bokuqala bezilwanyana eMzantsi Afrika

Allison Cooper

Kube kukuzaliseka kwephupha lakhe umhlali wase-Randburg uPhumelela Mthimkhulu (21), owayezithandela izilwanyana kwasebuncinaneni bakhe. Oku kusemva kokuba abengomnye wabongikazi bokuqala abathweswe izidanga zokuba ngabongikazi bezilwanyana.

Kutsha nje uMthimkhulu wethweswe isidanga se-Bachelor of Veterinary Nursing kwiDyunivesithi yasePitoli (i-UP), nekuphela kweyona ndawo yoqeqesho lwezilwanyana eMzantsi Afrika.

Andikayikholelwa nangoku into yokuba bendiyinxalenye yabafundi bokuqala ukuthwaliswa isidanga, emva kweminyaka eminzi ziqulunqwa ezi zifundo, ndiziva ndifumene elona wonga elikhulu.

“Ndiyawabulela amathuba kunye neengcango eziza kusivulekela thina bongikazi ukuze sikwazi

ukuqhubekela phambili nezifundo zethu kwaye sibe ziingcaphephe emsebenzini wethu, nto leyo kwakunzima ukuyenza kwixesha langaphambili,” utshilo.

U-Tamarin Fisher, nongu Mongameli woMbutsho waBongikazi Bezilwanyana eMzantsi Afrika, uthi eli lelona ngxatho likhulu kwimbali yeminyaka engama-42 yalo msebenzi.

“Le mfundo entsha enesidanga seminyaka emithathu iza kunika abongikazi abaqeqeshiweyo ithuba lokubhalisela izifundo ezinomsila, ngethemba lokuba sizakude sifikelele kwinqanaba lokubathwalisa izidanga zewonga le-honours, i-masters kwakunye ne-PhD.”

Oogqirha bezilwanyana banyanga izilwanyana ezonzakaleyo kunye nezifo, ngendlela efanayo naleyo ugqirha abonelela ngayo ngonyango lwezempilo kubantu. Abongikazi bezilwanyana babalulekile njenge nxalenye esebenzisana noogqirha abaqeqeshelwe izilwanyana,

utshilo uMthimkhulu.

“Ezinye zezakhono ezibalulekileyo ekufuneka umongikazi azibonakalise kukukhathalela izigulane, ukunxibelelana nabanini bezilwanyana, ukuncedisa oogqirha bezilwanyana ngeenkqubo, nayo nayiphi na into eya kunceda isibhedlele sonyango lwezilwanyana ukuba sisebenze ngendlela eyonelisayo.

“Ngeminye yemisebenzi enomvuzo. Ukuba ufuna ukuba ngumongikazi wezilwanyana, ungavumeli uloyiko okanye ukuswela ulwazi kukuthintele ekuzameni nokonwabela lo msebenzi, kuba lo msebenzi ungakwazi kutshintsha ubomi bakho bubengcono,” utsho uMthimkhulu.

Inkxaso- mali yokufunda yokujongana nokunqongophala kwezakhono

Ngenxa yokunqongophala okukhulu kwezakhono kweli candelo, uMthimkhulu akazange asokole ukufumana

umsebenzi.

“Kunyaka wam wokugqibela ndibe nethamsanqa elikhulu lokufumana umsebenzi kwisibhedlele sezilwanyana i-Fourways Veterinary Hospital. Ndiqale ukusebenza apho kwisithuba esimalunga ne-nyanga emva kweemviwo zam zokuphela konyaka, kwaye bendiwonwabela umzuzu-nomzuzu endiwuchitha emsebenzini,” utshilo.

UGunyaziwe weCandelo lezeMfundo noQeqesho kwi-Candelo lezeMpilo neNtlalontle




UPhumelela Mthimkhulu ongomnye wabongikazi bezilwanyana bokuqala ukwethweswa izidanga kweli lizwe.

Liqhubeka kwiphepha lesi-2



Landa ikhadi lakho lelayisenisi yokuqhuba

Iphepha lesi-2



Ukwakha kwakhona ubomi emva kwezikhukula

Iphepha lesi-3



Ukufunda i-Vuk'uzenzele khuphela i-GOVAPP kwi:



Khangela u-SA Government kwi-Google playstore okanye kwi-appstore



QHAGAMSHELANA NATHI

Vuk'uzenzele

@VukuzenzeleNews

Iwebhusayithi: www.gcis.gov.za

Email: vukuzenzele@gcis.gov.za

www.vukuzenzele.gov.za

Tel: (+27) 12 473 0103

Tshedimosetso House:

1035 cnr Frances Baard and Festival streets, Hatfield, Pretoria, 0083

EYASIMAHLA AYITHENGISWA

Liqhubeka lisuka kwiphepha loku-1

(i-HWSETA) lizibophelele ekujonganeni nokunqongophala kwezakhono okugqithisileyo kwicandelo lonyango lwezilwanyana kunye nokuqinisekisa inguqu.

Kutshanje i-HWSETA isungule iPhulo Lokuxhobisa nokuFundisa ngobuNzululwazi Kwezilwanyana, ibambisene neSebe leMfundo ePhakamileyo noQeqesho, kwaye iza kutyelela izikolo zasemaphandleni ngelokukhuthaza abafundi ukuba bathathele ingqalelo iinkonzo zonyango lwezilwanyana njengekhondo lomsebenzi.

Ikwabhengeze ngeenkxasomali zemfundo ezingama-60 kwiindawo ezisemaphandleni zaseMzantsi Afrika, ngeloku jongana nokuqongophala okumandla kooqirha bezilwanyana kunye nabasebenzi abancedisayo kunyango lwezilwanyana.

“Ezi nkxaso-mali

zemfundo zijolise ngokukodwa kubafundi abakwiindawo ezisemaphandleni nanjengoko bangathi bakwazi ukubuyisela ulwazi kumakhaya abo,” utshilo uGqirha Nomfundo Mnisi, uSihlalo we-HWSETA.

USekela Mphathiswa weMfundo ePhakamileyo, iNzululwazi noTshintsho, uButi Manamela, uzamkele ngezandla ezishushu ezi nkxaso-mali.

Icandelo loBunzulu-lwazi Bezilwanyana lase-UP liza kuncedisa i-HWSETA ekwaziseni, kunkxaso-mali yokufunda kunye nakumaphulo ayo okugaya umtsalane ebantwini.

“Kwakhona siza kunceda i-HWSETA ekulawuleni inkxaso-mali yokufunda, ezakuba yabelwa abafundi bonyaka wokuqala kubunzulu-lwazi bezilwanyana abaphuma kumaqela atyunjiweyo,” utshilo u-Chris van Blerk, oyiNtloko yezoNxebelwano kunye Namajelo osasazo nopapasho kwiCandelo loBunzulu-lwazi

Bezilwanyana.


Uthi ulutsha olunethemba lokulandela emanyathelweni kaMthimkhulu lubhalisele unyaka wokuqala e-UP kufuneka lube kanti sele lunaso iSatifikethi seMatriki sikaZwelonke (i-NSC), okanye isiqinisekiso esilingana noko, kwaye lube kanti lunazo iimfuneko kunye namankqaku abuncinane bawo bamkelekileyo kweli ziko lemfundo.

“Kwimfundo yesidanga se-Bachelor of Veterinary Nursing, bafuna aManqaku okwamkelwa angama-28 ubuncinane kunye ne-NSC enoLwimi lwaseKhaya lwesiNgesi okanye uLwimi lokuQala oloNgezelelweyo lwesiNgesi, izifundo zezi-balo, kunye nezifundo ze-physical sciences okanye i-life sciences,” wongeze watsho.

Ukuze ulutsha lufumane ulwazi oluthe vetshe malunga necandelo eli, lungaqhagamshelana nonyango lwezilwanyana lwabucala okanye

luthethe noGqirha abanyanizelekileyo benkonzo yoluntu (i-CCS) abayinxalenye yeSebe lezoLimo, uBuyekezo lweMihlaba noPhuhliso lamaPhandle (i-DALRRD) kwilizwe jikelele.

“Inkqubo ye-CCS ijolise ekuboneleleni ngeenkonzozonyango lwezilwanyana ezinamaxabiso afikele-

lekayo nezikwaziyo noku fikelela kwiindawo ezingabonelelwanga ngokwaneleyo kunye nezinezibonelelo ezihlwempuzekileyo eMzantsi Afrika. Ngokunjalo, oogqirha bezilwanyana kule nkqubo bazakuhlala besebenzanjengemithombo yolwazi elungileyo,” utshilo u-Van Blerk. 

Usifaka njani isicelo

Ukufaka isicelo sokufumana enye yezi nkxaso-mali zintsha, abo abaza kuba ngabafundi kunyanzelekile ukuba bafake izicelo ze-Bachelor of Veterinary Science kunye ne-Bachelor of Veterinary Nursing e-UP (zombini izifundo zokukhetha) kwinkqubo ye-intanethi ye-UP ethi www.up.ac.za/online-application. Abafaki-zicelo akufuneki bafake izicelo kwi-HWSETA.

Umhla wokuvalwa kokufakwa kwezicelo ngowama-30 kweyeSilimela.

Ngolwazi oluthe kratya malunga namakhondo obunzulu-lwazi bezilwanyana ngaphakathi kwe-UP, ndwendwela ku- www.up.ac.za/faculty-of-veterinary-science.

Ngolwazi oluthe kratya malunga neenkxazo-mali zokufunda ezikhoyo lweli candela, ndwendwela ku- www.up.ac.za/faculty-of-veterinary-science/article/33926/bursaries-for-veterinary-science-studies.

Landa ikhadi lakho lelayisenisi yokuqhuba

Abaqhubi beenqwelomafutha abafake izicelo zekhadi elitsha okanye lokuhlaziya ikhadi lelayisenisi yokuqhuba okanye imvume yokuqhuba ngokomsebenzi (i-PrDP) phakathi kweyeDwarha neyoMnga kulo nyaka uphelileyo bayabongozwa ukuba bazilande.

Ngokutsho kweQumrhu loLawulo lweZithuthi zeNdlela (i-RTMC), yi-42% kuphela yamakhadi elayisenisi yokuqhuba kwengama-32 748 aveliswe ngeli xesha sele elandiwe.

UMphathiswa wezoThutho uFikile Mbalula uvule amaziko eelayisenisi e-RTMC e-Midrand nase-Eco Park kulo nyaka uphelileyo, ephendula ngokusilela kwamaphephamvume okuqhuba ebesele

ephelilewe lixesha ngenxa ye-COVID-19.

I-Akhawunti yeKhadi leLayisenisi yoMqhubi, eyenza iilayisenisi, isebenza imini nobusuku ukukhawulezisa kokwenziwa kwala makhadi kwaye izama kangangoko ukuba ekupheleni kwenyanga yeSilimela libesele liqukunjelwe inani ebelisilela emva.

I-RTMC ithi abantu bangakwazi ukujonga ubume besicelo sabo ngaphambi kokuba bade baye kulilanda kwiziko lovanyo.

Oku kusenokwenziwa nge-SMS okanye kwi-intanethi.

Imibuzo ngelayisenisi yokuqhuba nge-SMS

Ukuba ngaba abafaki-zicelo banombuzo omalunga nelayisenisi yokuqhuba, bangathumela inombolo yabo yesazisi ku-33214. Emva kokwenza njalo bazakufumana enye yezi SMS zilandelayo:

- *Application received: The application was received, but has not yet been processed.*
- *Production queue: The card is still being processed and manufactured.*
- *Produced and ready for collection: The card will be ready for collection in 21 days. However, due to the high number of cards being processed, the RTMC advises you to wait 35 days before going to collect.*
- *Problem card: There is a problem with the production of your card. Please return to*

the testing centre.

Xa unombuzo ngesicelo se-PrDP, thumela inombolo ye-ID yakho ku-44220.

Xa unombuzo welayisenisi yomqhubi kwi-intanethi


Ungakwazi ukufumana ulwazi ngobume besicelo sakho simahla kwi-intanethi.

- Ndwendwela ku-online.natis.gov.za.
- Yenza iprofayili ukuze ukwazi ukungena.
- Cofa kwindawo yokujonga ubume besicelo sakho kwi-deshibhodi.

Abo banamaphepha-mvume okuqhuba aphelelewe lixesha phakathi kwenyanga ye-Nkwindla 2020 ukuya ngomhla wama-31 kweyeThupha 2021, nababephoswe ngumhla



wokugqibela wokuhlaziywa owawu ngomhla wesi-5 kuCanzibe, bayacetyiswa ukuba bafumane ilayisenisi yokuqhuba yethutyana xa befaka isicelo sokuhlaziywa kwabo ukuze bahlale bengabaqhubi abathobele umthetho.

Nangona amaziko e-RTMC evulwa ukususela ngoMvulo ukuya ngeCawe ukusuka ngentsimbi yesi-7 kusasa ukuya kweyesi-9 ebusuku, uluntu luyakhuthazwa ukuba luzithathele icham lemigca emifutshane ngoLwezihlanu nangempelaveki. 

Ulwazi lunikezelwe i-RTMC



government communications

Department:
Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and Production

Regomoditswe Mavimbela
Regomoditswe@gcis.gov.za

Acting Editor-in-Chief

Zanele Mngadi | Zanelemngadi@gcis.gov.za

Acting Managing Editor

Tendai Gonese | tendai@gcis.gov.za

News Editor

Noluthando Motswai

Writer: More Matshediso

Graphic Designers

Tendai Gonese | Benny Kubjana

Production Assistants

Jauhara Khan | Sebastian Palmer

Language Practitioners

Nomgcibelo Motha | Boitumelo Phalatse
Thandolunye Magudulela | Sizwe Ziqubu

All rights reserved. Reproduction of the newspaper in whole or in part without written permission is strictly prohibited.

Vuk'uzenzele
is published by Government
Communications (GCIS)



Printed by:



Distributed by:





Ukwakha kwakhona ubomi kunye neendlela zokuziphilisa emva kwezikhukula

Sele kusondela kwisithuba esingangenyangethile ezimbini ukususela oko izikhukula zathi zenza umonakalo owaba yintshabalalo kwiindawo ezithile zaKwaZulu-Natal, eMpuma Koloni naseMntla Ntshona, ezi zikhukula zabangela ukuphulukana nobomi kwabantu kunye nomonakalo omkhulu wezindlu neziseko ezingundoqo.

Kutshanje bendityelele eThekwini KwaZulu-Natal ndiyokudibana noosomashishini basedolophini ngeenjongo zokubanika inkxaso kwiinzame zabo zokubuyisela ukusebenza kwabo.

Ngelixa lemeko eyintlekele yemvelo igadla kanabom, kwakukho inkxalabo yokuba abasemagunyeni abanawo amandla okanye umnqweno wokusabela ngokufanelekileyo nangempumelelo kwimeko emaxongo ehlaselabo baphulukene nayo yonke into.

Utyelelo lwam lwesibini kwesi sixeko emva kwezikhukula, lundicacisele ngokuthe bhaa ukuba le nkxalabo yayingaqondiswanga ngokwenene. Kwiphondo laKwaZulu-Natal, njengaseMpuma Koloni naseMntla Ntshona, bonke abo banoxanduva bebethe bhazalala besebenza nzima bebila besoma bezama ukubuyisela ubomi esiqhelweni emva kweli shwangusha.

Iziko leSizwe loLawulo lweNtlekele belinxibelelanisa onke amacandelo karhulumente ngeenzame zokubonelela ngoncedo

loluntu kumakhaya amaninzi athe achaphazeleka. Kuyavuyisa ukubona imibutho engekho phantsi kukarhulumente, imibutho yamashishini kunye nemibutho yoncedo isebenzisana norhulumente ukunika uncedo olufuneka ngamandla emaxhobeni.

Bonke ke abathathinxaxheba babonelele ngokutya, iimpahla, iingubo, iingxowa ezinezinto ezibuyisela isidima somntu kwakunye nempahla yesikolo kwiintsapho ezisemngciphekweni ngelo kuhlangabezana neemfuno zazo ezingundoqo. Kungoku nje sele kunikezelwe ngeenkonzo zokuhlala ebantwini abangaphezu kwama-7 000 kwezona zithili zintlitheke kano-bom KwaZulu-Natal. Sele uqalile umsebenzi wokwakha iindawo zokuhlala zethutyana kwaye neendawo ezikumhlaba karhulumente sezichongiwe ukuze kuhlaliswe iintsapho ezichaphazelekileyo KwaZulu-Natal.

ISebeleMicimbiyezeKhaya, lezeMpilo neloPhuhliso lweNtlalo belisoloko lithe gqolo linceda uluntu oluchaphazelekayo ukuze lukwazi ukufikelela kwinkonzo ezibalulekileyo. Umzekelo, iiofisi ezingomahamba nendlwana ezinceda abo baphulukene namaxwebhu abalulekileyo kwizikhukula ukuba bafumane ii-ID ezintsha zamakhadi, nokukhutshwa kwakhona kweziqinisekiso zokuzalwa. Iinkonzo zempilo ezingomahamba nendlwana, kubandakanywa ugonyo

lwe-COVID-19, zinikwa abantu abakwiindawo apho amaziko akhoyo angekasebenzi ngokupheleleyo. Akwakhona ke namatile tile enziweyo okulungiselela ukuhlawulwa kwezibonelelo zikarhulumente kuluntu oluthe lwachaphazeleka.

Kukwathengwe amagumbi okufundela angomahamba nendlwana ukwenzela ukuba ukufunda nokufundisa kungaphazamiseki ithuba elide kwizikolo ezichatshazelwe zizikhukula.

Uyaqhubeka umsebenzi wokulungisa iindawo zokucocwa kwamanzi amdaka ezonakeleyo, izitishi zokumpompa kunye nemibhobho yokuhanjiswa kwamanzi. Iindlela ezonakeleyo nazo ziyalungiswa. Kukwacwangciswe ukwakhiwa kweebhulorho ezintsha ezilishumi elinesibhozo njengenxalenye yenkqubo i-Welisizwe Rural Bridges.

Kukwakho nenkqubela phambili enkulu ekulungiseni iziseko ezingundoqo ezixhasa iZibuko laseThekwini. Ngenxa yokubaluleka kwezibuko kuqoqosho lwelizwe nolwelizwekazi, zilungisiwe iindlela zokuthutha ezibukweni, imisebenzi yase zibukweni ibuyele ngokupheleleyo kananjalo umsebenzi wokulungisa iziseko zoncedo zikaloliwe ezonakeleyo nawo uyaqhubeka.

Amanyathelo awongezelekileyo aye amiselwa ukubonelela ngenkxaso yemali kumashishini amakhulu namancinane asengxakini. Oku kuyimfuneko engxamisekileyo ukuze



kuqinisekiswa ukuba amashishini ayakwazi ukuhlala emile kwaye nemisebenzi ikwazi ukuzinza.

Kumaxesha ahlukeneyo kwimbali yethu yentando yesininzi, siye sajongana neziganeko kunye neemeko eziye zavavanya ngokuqatha ukuzimisela kwabantu bethu kunye nokusebenza ngeempumelelo kwamaziko ethu. Sibone intsebenziswano nenkxaso engaqhelekanga kuluntu oluchaphazelekayo lwaKwaZulu-Natal, eMpuma Koloni naseMntla Ntshona. OoMasipala noorhulumente bamaphondo bebesebenza ngokusondeleleneyo namasebe kazwelonke kunye nee-arhente ukuze abantu bakwazi ukwakha kwakhona ubomi babo kunye nokubuyisela uqoqosho lwasekuhlaleni.

Baye basebenzisana nabo bonke abathathi-nxaxheba abasuka kuzo zonke ezi

nkalo ukuqinisekisa ukuba silungelelanisa ngokufanelekileyo iinzame zokubuyisela ubomi nokuqinisekisa ukuba xa sisakha ngokutsha sakha ngendlela ezokwazi ukumelana neziganeko ezinefuthe elibumila bunje kwixesha elizayo.

Ukunyamezela koluntu oluchaphazelekayo, ukuzimisela kwalo ngempumelelo kunye nokukwazi kwalo ukuhlangana lube mxhelomnye ngamaxesha obunzima kube yinkuthazo enkulu kuthi. Sibothulela umnqwazi bonke abo bebeyinxalenye yeenzame zokunceda abantu bamaphondo achaphazelekayo.

Njengorhulumente, sihlanganisa zonke izibonelelo ezikhoyo kwaye sizama ngazo zonke iinzame zokuqinisekisa ukuba, njengoko sisakha ngokutsha, akukho mntu ushiyeka ngasemva. **U**